

O'zbekiston Prezidenti Fransiyaning yetakchi kompaniya va banklari rahbarlari bilan uchrashdi



Bugun, 21-noyabr kuni O'zbekiston Respublikasi Prezidenti Shavkat Mirziyoyev Fransiya rasmiy tashrifi doirasida Parij shahrida ushbu mamlakatning yetakchi kompaniyalari va moliyaviy tuzilmalari rahbarlari bilan uchrashuv o'tkazdi.

Tadbirda «MEDEF» Fransiya korxonalarini harakati bosh direktori Filipp Gote, «Airbus», «Orano», «Suez», «Alstom», «Total Eren», «EDF», «Schneider Electric», «Natixis» kabi 20 taga yaqin yirik kompaniya va banklar rahbarlari ishtirok etdi.

Prezidentimiz uchrashuv ishtirokchilarini qutlab, rasmiy tashrifning birinchi kunidagi tadbirlar ishbilarmonlik masalalariga bag'ishlanganiga e'tibor qaratdi.

- Bu O'zbekiston muhim va ishonchli hamkorimiz - Fransiya bilan iqtisodiy hamkorlikni kengaytirishga intilishi qat'iylikdan yana bir bor dalolat beradi, - dedi davlatimiz rahbari.

Bugun O'zbekistonda xorijiy investorlar uchun keng imkoniyatlar yaratilgani ta'kidlandi. Valyuta bozori erkinlashtirildi, foydani repatriatsiya qilishga barcha cheklovlar bekor qilindi, banklar, yirik sanoat va infratuzilma obyektlarini xususiy lashtirish dasturi boshlandi, davlat-xususiy sheriklik mexanizmlari faol joriy qilinmoqda.

Yangi O'zbekistonning taraqqiyot strategiyasiga muvofiq tadbirkorlikni yanada rag'batlantirish, sarmoyadorlarning huquqlarini himoya qilish, mulk daxlsizligini ta'minlash va boshqa yo'nalishlarda aniq choralar amalga oshirilmoqda.

- Har bir investor O'zbekiston deganda, eng avvalo, barqarorlik va kelajakka ishonchni tasavvur qilishiga intilayapmiz, - dedi Shavkat Mirziyoyev.

Jahondagi bugungi beqarorlik sharoitida manfaatlarni hisobga olish va o'zaro ishonchga asoslangan ko'p

qirrali va konstruktiv sheriklikni chuqurlashtirish tobora muhim ahamiyat kasb etayotgani ta'kidlandi.

Shu ma'noda, Fransiya biznesining O'zbekiston bozoriga chiqishi uchun katta istiqbollar ochilmoqda. Mamlakatimizning jozibadorligi Markaziy Osiyoda aholi soni bo'yicha eng yirik davlatligi, mahsulotlarimiz MDHning ulkan bozoriga bojsiz yetkazib berilayotgani bilan ham izohlanadi.

O'zbekiston fransiyalik tadbirkorlarni ishlab chiqarish uchun zarur infratuzilma bilan ta'minlash, imtiyozlar va kafolatlangan xaridlar ko'rinishida qo'llab-quvvatlash va boshqa ko'mak choralari taqdim etishga tayyor ekanini ta'kidlandi.

Prezident Shavkat Mirziyoyev yuqori qo'shilgan qiymatli mahsulotlar ishlab chiqarish quvvatlarini barpo etish, "yashil" energetika, oziq-ovqat sanoati, kimyo va avtomobilsozlik, elektrotexnika va elektronika tarmoqlari, sog'liqni saqlash sohasini uzoq muddatli va o'zaro manfaatli hamkorlik uchun eng istiqbolli yo'nalishlar sifatida qayd etdi.

Sheriklikni kengaytirish rejalari yuzasidan atroflicha fikr almashildi. Fransiya ishbiarmon doiralari vakillari o'z chiqishlarida O'zbekistonda amalga oshirilayotgan iqtisodiy islohotlarni yuqori baholadi. Mamlakatimizda qaysi aniq loyihalarni amalga oshirish niyatida ekanini bayon qildi.

Fransiya biznes delegatsiyasining har bir a'zosi bilan suhbatlashib, davlatimiz rahbari tadbirkorlarni mamlakatimizga kelish va O'zbekiston investitsiya kiritish uchun eng qulay joy ekaniga ishonch hosil qilishni taklif qildi.

Uchrashuv yakunida O'zbekistonning mas'ul rahbarlariga tadbirda bildirilgan barcha tashabbuslarni o'z ichiga olgan hamda ularni amalga oshirish mexanizmlari, aniq muddatlari va ijrochilari ko'rsatilgan Amaliy chora-tadbirlar rejasini ishlab chiqish va tasdiqlash topshirildi.



Manba